



職方典第一千七十七卷

汀州府部藝文一

龜山賦

明陳喆

龍湖之陰有層崖千疊崢嶸乎如彌天之陵者曰天上岡襟萬壑而逶迤帶千林而傍徨謝蓮峯而顧復孫鋏嶺而恐惶連阿霧擁疊嶂雲翔爰有一阜若蹲若聳或低或昂我儀圖之儼一靈龜突踞於大山之旁蒼襲褶以爲衣卉曾被以爲裳石嶙峋以爲甲樹縱橫以爲章吁嗟活兮其儀不忒雖匪六眸靈蠭是式佞衣蜿蜿鼉鼉鼉鼉就而睨之頭昂足踞是云龜山一田叟策杖而來曰此山也是宋儒產於斯因取以爲號者也粵自麟吐玉書泰山巍巍濂洛關閩岱宗衍支吾道南矣嗟而鼉而賢人之生千幾百年突兀於斯嗚呼名山三百支山三千彼龜山者遞而蜿蜒李羅朱蔡胡劉之倫往往融結而爲山川維昔楊游同立雪深三尺豈伊及門亦旣入室高山萬仞咫尺宮牆截截業業龜山之鄉睇靈蔡而羨異幸無怪測謚之與亡羊於是徘徊未去目逞神留念鴻儒於碩學邈顏朋而冉僑或因裔以溯統或探源而叩流慨高山而仰止悵古今之遺丘幸萬古之不夜闌堂構於

南陬昔金人且有問曰先生其在否豈生長於東南不責沈以何尤於是歌曰龍湖湯湯瀏泚潏潏
龜峯層翠如蓮吐萼海濱而鄒魯非茲而孰啟爾宇鄒魯而海濱非茲而孰覓厥津扶風絳帳西蜀
元亭曷如堂廡春秋薦馨歲五百之前兮爾挺嶙峋歲五百之後兮孰紹門閭

玉虛洞天賦

前人

蓋在昔混闢氏剖南嶽之盤爲武彝之嶺臬而有三十六峯逶迤上游玉虛之洞乃孕厥嶺崑崙
山而叩聳帶獅巖而聿戛裔堞冠嶺懸崖綴壑窈窕眇眇冥冥濛濛幾折斯升委蛇而通仙源之洞
敞若穹窿瑤漿滴涓涓滴倒瀉於垂蓮石隙之中厥甘如醴清脾沁胸鼃梁橫架宛若垂虹鵲
巖伏隱亦似呼風至夫天柱並撐擎空欲墜月臺孤聳留蟾不寐鍾呂仙隱飄飄游戲蜂窠如斗孰
生厥薈野人削之蠲煩釋滯瞻仙源之洞側左闢洞乎桃華分石門而下入寂羣游而不譁夏火雲
而炎滅冬雪蕊而溫加洞門造化安知其他俄而挑浪排空層層洶湧若從上下觀之心恐簾曰水
晶何以名之仙瀨綴裊彷彿因以太極之宮孰手一丸彼仙人者弄而閒閒亦有躍鯉詎像厥物墟
氣凌騰窅窅忽忽祥雲之石五色瓏然若隱若現掩映何年丹黃赤綠紫黝相鮮須臾之間逢逢暉

嘒耳不能辨意不及會仙籟之鐘鼓笙竽飄飄然於洞門之外內爰有怪石崎嶇巖突乎如狷之將墮昂乎如鷹之欲擊向佛像而皈依亦垂頭而敘翼更有鴻濛窅幽影日中而未甚辨色若人之有宮寢肅而挺立亦莊亦嚴實維伊何冕石巍然四壁懸譎千崖簇異其嶢嶢枝枝者洵不可以數計洞左而下蜿蜒而右石磴嵯峨如龍翔首矯矯行空馮虛御風寒氣襲人是爲飛龍巉仄幽邃不炬不矚郢冠而入陰飈弗弗委蛇屈首無慮有二十餘曲似有亭烟丹竈混元九還千煉羨門偃佺躍馬之石狀儼騰驤昂首蹲趾厓足之旁宛彼鸚鵡亦聳而立雖不能言默留厥跡石壁側布厥有仙牀齒齒石闌平廣而長須臾半壁突出其上儼如手擎仙人之掌若彼仙轡倒插於地琵琶筆架危懸橫置一線之天微光可覩朦朧潏潏周山巔而覓之則不見其處中有澗溜澈冽水窟既寒既凜淪肌浹骨伏地而流潛踰十餘里之外而滾滾渤渤幽洞深宵下垂若磬訇訇鏗鏗仙籟且應與乎瀏瀏黝乎幽幽洵仙人之所棲分三島而茲留垓烏石塊虎丘躔天姥肩羅浮足不及歷眸不及收耳不盡接心不及謀攢奇聚怪洞府仙州洵海南之異地豈羨吞吐雲夢者八九而遠覓島外之麟洲

建縣事蹟奏議

高明

題爲處置地方事據福建汀州府上杭縣申備通縣里老耆民廖世興等呈稱本縣所管太平溪南金豐豐田四里相去本縣三百餘里接連漳州廣東地方凡幹辦一應公務往復動經半月又兼地僻山深人民頑梗平居則以勢相凌有事則持刃相殺天順六年間李宗政等聚衆劫掠鄉村今成化十四年鍾三等又聚賊殺人實因地方廣闊治理不周呈乞轉達上司添設一縣管理使公事易辦強梗知去等因到院臣會同鎮守福建御用監太監盧勝等看得民心雖願建縣未審山川有無相應去處選差有才識按察司副使劉城布政司叅議陳渤前去復勘民情相度地勢續據各官呈稱備審上杭縣里老人民萬口一辭俱言相應添設縣分又帶同知縣石塘并諳曉地理術人親詣太平溪南金豐豐田四里萬山稠密地方窄狹內有溪南里第五圖地名田心一處山環水繞地方平坦南北約有七里東西約有四里畎畝相連居民相接堪以開設縣治其地東至漳州府龍巖縣一百四十里西至廣東程鄉縣一百六十里北至上杭縣一百五十里俱各地里適均相去不遠獨於南至廣東饒平縣二百餘里相離路遠況彼處地名大靖小靖頑民節來侵害合於金豐里地名

三層嶺開設巡檢司一所守禦地方查得上杭縣總計十里五十九圖田地山塘共計二千七百九十七頃九十三畝除環繞上杭縣里分不動外南以溪流爲界今撥溪南太平金豐豐田四里屬新立縣分但溪南里共該六圖內第三圖在溪北及太平里共該五圖內第五圖與上杭縣相近拆出溪南里第三圖太平里第五圖仍屬上杭縣管理又本縣勝運里一十一圖內第五圖第六圖又與新設縣分相近拆出二圖屬新縣所轄今計上杭縣共得六里四十圖新縣共得四里一十九圖具結畫圖貼說又呈到院會同鎮守福建御用監太監盧勝巡按福建監察御史閻佐并都布按三司署都指揮同知等官鄭賢等叅看得上杭縣溪南等里賊情已息賊黨多擒其餘脅從之徒盡行招撫復業與太平等里民心樂從立縣實爲子孫保家之謀萬山中惟田心地勢寬平可以立縣足爲封疆鞏固之規揆之制度百里一縣今約計上杭縣南北該三百餘里理宜添縣欲於地名田心開設縣治取名永定縣又欲於地名三層嶺開設巡檢司取名三層嶺巡檢司又看得本地山多田少民稀難設全縣乞勅吏部於舊任廉能相應官員中選除知縣典史巡檢教諭各一員前來創始其醫學訓科陰陽訓術道會僧會待知縣到任以後揀選相應之人起送赴部除授但前項里分民多

貧窘又有新招復業者今創立縣衙儒學巡檢司城隍廟并鋪舍醫學等衙門不取民間一錢一夫俱會議於別項措置本料工價足穀取用仍令原經手副使劉城叅議陳渤經營整理分派田糧仍將上杭縣四里一十九圖戶口錢糧割入新立縣分屬汀州府所轄如此則良善之民有所依歸強梗之人有所鈴束地方有托永遠無虞緣係處置地方事理未敢擅便具本專差某親齎謹題請旨

新造城記

柯潛

上杭爲汀屬邑舊號樂土無反側之虞正統己巳沙尤寇發延蔓旁邑而上杭被其害爲尤深時知縣岑高奏請築城以民力罷憊不果景泰壬申知縣黃希禮申前請得俞旨於是右布政使石公瑄臨視其邑知縣率邑人鄭仕敬林祖楨孔文昌等二十餘人協心供事天順壬午溪南里民嘯聚而工阻巡按御史伍公驥左布政使姚公龍副使錢公璉僉事游公明同撫捕之因民請謂城郭宜守以兵乃奏調汀州衛右千戶所官軍捍禦之成化丙戌巡按御史朱公賢右叅政許公振叅議張公雄僉事牟公俸劉公子肅以城隘不足居軍乃更擴大之知縣胡鉞任其事丁亥巡按御史涂公棐又委成於本府同知程熙通判吳桓而以邑人郭明德唐紀等二十餘人佐之繼而右叅政趙公昌

副使何公喬新僉事周公謨都指揮吳公梟各出意見經畫其未備者而周公勸督之力尤勤遂以壬辰正月畢工高廣堅壯邑人喜其可恃以爲安也謂宜有文以記其成周公乃遣邑庠生林廷瑞具始末來屬筆於余余惟君子之任官貴於勤其政溥其利於民使民傾心仰戴可也苟得民心雖畫地而限植表而守効死者不去冒死者不能入否則封疆之界不足以爲域山谿之險不足以爲固而況於城郭乎雖然王公設險見於易商邑翼翼歌於詩蓋防患立極皆政治所當先者其可置而不問乎巡按及藩憲諸公皆朝廷之所掄選敷宣政教得本末先後之宜是固有以得民心矣又以防患立極有不可緩者此上杭之城所以作也然自肇建迄今二十餘載功始告備蓋役民之力欲其紓用民之財貴有節而民心亦怡然承順未嘗以爲勞也以此心而守此城則上杭又將號爲樂土以復其初而凡與謀爲此城者其勳烈並著於永久矣春秋之法重民力凡有興作必書譏不時也上杭之城作於寇難之後而又施爲有序不失其時異乎春秋之所譏者余故爲之記俾刻石置於城隅以告後之人焉

青龍橋記

趙可與

青龍橋者憲大夫侯公之所成也橋以龍名者津當邑之左偏而面峙一山如虎而突取諸龍以壓鎮之義也夫杭在汀叢山中亦闔廣江浙之衢橋之當成久矣自夫有杭治問津者必曰唯橋便自夫有憲臺建議者必曰唯橋便而卒未有能成之者何哉才或有不足心或有未暇爾侯大夫起家甌東才子爲名進士爲賢部曹據禮持正忤權臣意遷謫嶺海垂二十年天子察其賢迺擢僉閩憲使鎮於杭公益加感激開誠心布公道興學校明禮義凡所以康民物而輯邊陲者無所不至居期年而政治邑之老若幼無賢不肖相率詣庭而以橋請公慨然曰此王政也乃白諸撫按贊出於河稅之贏而民不知費役集於助義之力而工不告勞石梁鰲立覆楹疊飛複道行空日中爲市鱗鱗然總總然蓋不知橋之忽然成矣方其未橋也雖或方之舟之而晝夜之不繼緩急之不時人之沒溺而死者幾何今公有是役而宿患悉除人固謂橋成之已晚矣獨其費用廣若近奢喜興作若近名自好者或深避之公得無慮及此乎余曰不然士君子之於天下入則爲上爲德盡言以正天下之是非出則爲下爲民悉慮以處天下之利害一身之生死禍福且不暇計而況於區區小嫌之恤哉昔蔡襄守泉州跨海與石建洛陽之橋凡三百六十餘丈非不勞且費也而當時之擊其短者豈

微其人襄屹不能動故能以有成今幾千百年而橋存如故夫橋存則襄存也而唯公之於襄則千載一人也其所就可知也橋焉已哉

遊滴水巖記

宗臣

余讀汀記歸化東北五里蓋有滴水巖云往徐君與余談茲巖大奇也戊午九月余督兵西征馳之歸化而揭君謁余曰君將出師紫雲乎則請於滴水駐餐焉於是明日以數騎東行踰嶺稍折而北已又折而東凡三折至巖巖壁陡絕外墜逕而上揭君遲之逕既有字故名迎仙余曰遲仙不愈迎仙哉堂後有亭亭題余怪其腐而因與揭君解衣其中遂易之曰振衣已乃聞垂垂而雨則滴水巖在焉其水有三一出垂石如蓮者二從石隙中下盛之以石盂揭君曰巖人咸飲此水嘗之甘已烹爲茶尤甘余曰蓋天漿乎蓋天漿乎其石乃蜿蜒而曲若龍足巖雲中而則隱則見者余怪焉稍前有斗石下垂類蓮而華者因名之垂蓮水石亦蓮不名者從水也又俯而睇其石隅僧在焉其爐烟陰陰上也余曰何僧揭君曰此記所稱賴僧者也其旣化而坐數日矣乃巖人始知之則大異之而因繪其軀以祀之此卽其軀也旱而禱輒雨旱之而禱更大雨則嘆曰有道哉有道哉夫人者宜顯

者也佛者宜幽者也今暴其身於明白四達之區而使蓋商牧子折其面目而嘻焉卽僧而靈固殷
殷怒也於是命藏之幽幽之者神之也洞凡三門其中而豎者類柱遂名之曰天柱而柱有三則又
名之曰中天柱左天柱右天柱有石類獅而門者其中更有斗石外懸中綵甚微若簪焉故名蜂窩
而揭君曰閭岷有心疾輒削其石水飲之卽愈石目日削不類窩矣眺而左有二門左者逕右者乃
橋斷橋橫其上而又虛其上若龍焉遂名之龍梁龍之左而上纍纍若珠又若垂楊之裊裊條條而
蕩者仰睇其右片石突而下久之嘆曰此墮猿也其石五色爲祥雲雲之下爲虛鳴二洞簪擊輒應
答虛則鳴也又一洞狹險旁曰天鼓簪擊之彭彭鼓聲爲余訝之又有冷然磬而幽者余曰此何聲
也揭君曰所謂石磬也左有洞洞有牀火乃入不火不入者牀而擊磬若履禪室焉余益駭揭君
乃命余觴余乃命侍子左鼓右磬颯然天籟滿山也有巨石整而偉余右睨之不得其名久之曰冕
哉遂呼爲冕石冕石者卽磬而牀者洞門也其洞最邃名曰鴻濛又起而環視鯉石鷹石龜石鰲石
又何其紛而錯也神奇哉神奇哉變化總翠幻鑄紛紜空白恍灼蒼翠飄忽則槩名之曰小崆峒云
余於是仰而嘆曰嗟夫余恨不與徐君同遊哉揭君曰何徐君思也曰余往歲與徐君蓋遊華陽洞

云洞自陶隱君來赫赫盛矣乃宋帝又丹書之其洞固不可入卽入無奇也使隱君而覲此宜何以稱焉且茲嶺之奇天奇之也旣奇之矣乃置諸荒山僻壤亂莽草野中不以奇稱也世之以片石假山稱其耳目者何限嗟夫嗟夫嗟夫嗟余又安知其解乎揭君曰華陽顯以陶故安知茲嶺不自今與華陽並名也嗟夫君欲陶我哉君欲陶我哉於是罷酒徐君名中行汀守與余友善先余三日遊遺余書揭君名鴻則與余同薦畿中也

遊玉虛洞記

張政

邑之東北五里雲林參差有巖歸如躡而上之巖門洞開鼈柱屹峙其中縱橫十數丈竇隙穹窿玲瓏百道以其上有石蓮倒瓣而開滴水潺湲故曰滴水或又以其幽窈攸虛又榜曰玉虛中橫石梁如龍如龜爪介森然殆欲挾風雨而上者分列而進其間雲物萬端魚龍百變石有鐘有鼓有磬有笙略加拂拭百竅皆鳴入地里許曲折窅冥奇怪不容思議列燭而過雖仙子去而仙子之牀爐衣履鸛鵲琴佩之屬宛如在壁也仙河闊可數尺其源不可復問其流不知越幾山而後見更進而天光一隙列如曙星旣乃出微達顯其循環無端所謂入北陸而出南陸者非歟壬寅七月六日侍老

父及父執來遊於此是日也飛觴酣酌絃管浩歌宮商迭奏天樂嘈嘈而谷應山鳴雲和風定仙耶凡耶殆摩詰所云峽裏不知有人事世中遙望空雲山者耶

登雪峯記

陳簾

雪峯者吾邑之南鎮湖南嶺而登可二十里丙戌夏半陳子遊大焦去雪峯差近十七日由松樹堂發履其他徑黃子則揚之僕導初歷林嶠繼涉崖坂倏乃穿叢薄而迷其嚮路虎豹之所養威狐狸之所凝息客行者隔三兩卽疑不可覓但聞戒途搜剔聲手先而足隨之旣七八里抵萬人坑頗幽曠復窮奧窔入浸浸乎密陰歷人久之見委蛇數隊者山樵也詰何來曰邑間道取此衆欣出谷散坐殊覺冥然僕促之行石古溪深彌塹而曲曰此故壘也進而鐘鼓樓又進而澗水潺潺夏苗冉冉里許林雞唱客無不顛倒一觴也抵庵飯已尾牛童來取極頂紆迴屈盤各鼓勇徑上唯揭子非彰蹣蹣塗問予笑謂曰怯元官家乎蓋元平章友定曾基此屯俗遂誤傳極頂爲皇帝殿云殆前而目眩心賊收卷羣動洶涌乎若萬派相先而赴壑人在舳艫中凌洪波乘巨濤兒孫村落沒乎不數者幾堆陳子乃歌曰破浪而馳亡傷險巇置彼鱸鱸直擣鯨鯢又歌曰蜂則馮房蟻則納穴如狙

而安陡爲生滅歌罷適風來舞梁蘭老之髯衆失矚對面峙峯方突兀競尊似可蹴而至予與揭子興勃勃便走數里特從焉日晡而尙繞其麓呼者曰山有恙乃還夜共揭子楊遂夢駕扁舟浮海遇大風掖之雲端獨挾小子而戲因笑墮覺覺則跨揭子之肘也曉起相謂曰遊茲審矣快無假五丁而騁茅簪鑽輿窟困野魅山君不得宮快一巔往苦霧帷幕連岡迺極高敞幽舉蒼茫亡希微隱快二捧觴而皎魄輪空鼓鐘送饋酬和罔倦者彌宵爭傳遊仙夢焉快三所憾者山遠酒不繼寺場僧不葺若發小願力可亭亭之可廬廬之客竟日攜酒從之奇祕將無盡藏而山靈未肯肯也啟閉需時安知來者弗如今言且衆念平章疇昔乎築小鄉堡而基磐綿控羣數十峯於園內況保閩關何若其願力者卒不克以死人莫違天感是得無憮然衆乃悉歎飯已黃子兄弟別去遂各無留志始由邑南正道下辭兩高峯却就兩低低又稱尊伏磴緣崖繞雙蝴蝶行俛瞰雲封一窩是邑城也此兩山則固邑城雙雙雄望者嗟乎僅雪峯伸拇臂耳雪峯邈不見而雄此兩山非親睹記幾認兒孫爲祖嗣哉邈邈抵城南嶺始就平渙乎若方濟滌滄滿睫波濤歸而神魂飄泊者累日

獅子巖記

前人

邑東五里是有獅巖是爲水口巖也巖狀奇頑不等視顧多可達人意其尤峴然者一仰面孤蹲額冠鬱森之木實類獅舉以目茲巖舊矣獅壓小庵庵構夙拙臨前留有幾許隙岸可占十數名樓遠瞬交移緣亘一巒看烟火都無俗氣平疇展衍千百塍畦控落連邨全乎高致雅量唯離南山稍失曠近在峯頂兀立浮圖復寺於其下游者多去此就彼自是巖之怪石亂流雄錯周攬未許俗子共快心焉丁亥之夏與鄭南叟一再搜剔審所謂巖下洞皆敞庭堂時苦湫隘耳鑽石縫數處昔人有倚爲外廚者給訝詘幽疑步履難盡然巖固不恃此奇也奇必老庵一帶身抱小澗左延西流傍巉岳俯洲渠倘獲拓除故址廣布亭臺遏兩溪障爲陂池環而隄之藏小舫於其內相與潏澗焉復引萬尺橋步南山下長楊細柳滿陌彌阡四出蕭疎月深風軟登臨屐歇便鼓枻歌還若而言雖未嘗作浮圖可也浮圖全勝矣嗚乎勝豈易全哉因與南叟幻臆焉而書爲記

玉華洞記

王源昌

予入閩過將樂噴噴咸稱邑之玉華洞與武夷競勝時予攬轡未遑作覽勝緣尋入清流道之中折突起兩峯峯峩如畫土人稱爲小玉華洞云予乃停驂登玩其洞二似聯壁相貫雖盈不數武中有

石似大士面壁時者有石似丹竈如人置鐙於孔上火痕猶存者有石似蟾宛然伏地恍若劉仙所遺者然其名不出里僅遐然以小名一似自謝其勝矣余爲侈其說以勝之蓋將之洞越城十里許非貴人聞客未易往茲固樵夫牧豎釋箠在蹬者皆得寓目焉遊不擇人其勝一將之洞必土人列炬始前茲固明白洞遠燎人心目遊不擇具其勝二將之洞風雨晦冥人裹足不入茲固風晨雨夕月夜晞朝皆可眺焉遊不擇時其勝三具此三勝洞可居然自勝其前則萬松環對巖列石屏十餘丈蔚蔚離奇如踞虎豹攀虬龍使有好事者作飛虹亘其空將巖與洞併作一片勝地則又不可盡以盆花小草名之因取洞中二詩附入玉華洞集使遊者知洞尙有餘支散在清流如山有祖孫宗有大小亦快事也

城壕記

何雲

汀城築於唐大曆四年刺史陳劍壕濬於宋治平三年郡守劉均是時但爲二壕西引南拔陂水流東以繞之歷宋至我明三百六十年於茲壕池久爲軍衛侵佃嘉靖丙戌冬太守邵公有道履任令各改正城西通津門外山半有西峯寺逼近城樓拆毀墟其地自基起至通津門止新開壕長八十

二丈闊七丈五尺深五尺五寸旁西有弓箭局東至西長五十一丈南至北闊四十丈內塘十口年
取魚鮮以資造軍器者自通津門起至廣儲門止壕長一百六十丈五尺闊八丈深四尺壕之中有
夾洲自東至西長三十二丈五尺北至南闊一十七丈洲之南又有夾壕自朱紫坊敵樓起至廣儲
門外中心街止長一百丈五尺闊五丈五尺深六尺壕之東西南北有板閘四處以積水又植蓮西
一壕以資用壕之南有射圃地一片長四十八丈上闊一十五丈五尺下闊一十三丈爲府縣學教
官蔬圃圃後有官塘一口長十丈闊九丈深四尺府學管業又塘一口逼近養濟院西長五丈闊四
丈深四尺縣學官塘自廣儲門起至鎮南門止壕長六十七丈闊八丈深五尺鎮南門外撤逼城屋
二十餘間官地二片各長九丈右闊八丈左五丈城之南有社學一區長七尺闊四丈六尺自鎮南
門起至麗春門止壕長六十五丈五尺闊八丈五尺深五尺五寸麗春之門西有紫微門一座下有
巨溝通壕水南注於河門之東有紫衣門一座官地二片又自紫微門由東迤西撤逼城屋百餘間
官地一片長一十三丈闊六丈近壕官街長七丈闊五尺近橋河岸官地長一十三丈闊四丈麗春
門外傍城左右有官地二片各長三丈闊二丈五尺濟川橋一座自麗春門抵臥龍山北壕長二十